

LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch



La «Fiutscher» a Cuiru ha avert sias portas

Chattar l'emprendissadi che plascha e che correspunda als agens interess n'è betg ina simpla chaussa. [Pagina 2](#)



La Via dal Meir duai vegnir sanada

La senda tranter Scharans e Muldain ch'ina bova ha destrui duai vegnir refatga. Co n'è anc betg cler. [Pagina 8](#)

FMR FUNDAZIUN
MEDIAS
RUMANTSCHAS

südostschweiz

SURSELVA

11 % dameins taglia a Mustér

Sch'ei va tenor la veglia dil cussegl communal da Mustér sche vegn il pei da taglia dalla vischnaunca sbassaus per 11 % sin 99 %. Quei conclus per mauns dalla votaziun all'urna ha el priu il mardis sera. Il termin dalla votaziun all'urna ei aunc buca fixaus. La suprastanza communal haveva proponiu al cussegl da vischnaunca da sbassar il pei da taglia per 2 %. Ulteriuras tschun etappas da reduziun da mintgamai 2 % duevan suandar ils proxims onns per la fin finala contonscher in pei da taglia da 98 %. (fmr/hh) [Pagina 5](#)

GRISCHUN CENTRAL

En cumegn-baselgia biling



Vent frestg pigl cumegn-baselgia Brinzauls cun la baselgia da Sontg Tgalester: el vign a far part da nov agl cumegn-baselgia Albula/Alvra. [FOTO ARNO BALZARINI/KEYSTONE](#)

Gio igl onn 2017 on fusiuno igls cumegns-baselgia catolics an Val Alvra – numnadamaintg chels d'Alvagni, d'Alvaschagn, Casti, Barvogn, Filisour, Farrera, Mon, Stierva e Surava. Chegl cun excepziun digl cumegn-baselgia da Brinzauls, tgi leva restar autonom. Malgros ena collaboraziun pastorala tgi funcziuna gio ples onns tranter igls dus cumegns-baselgia vign la pleiv da Brinzauls ad appartigneir a parteir dall'antschatta schaner 2024 tigl cumegn-baselgia Albula. Ed igl madem mument è alla radunanza dall'emda passada per realisar la fusiun er nia decida tgi cun chella fusiun sa nomna igl cumegn-baselgia Albula da nov cun en nom rumantsch/tudestg: cumegn-baselgia Albula/Alvra. (fmr/gns/sab) [Pagina 8](#)

SURSELVA

Ina discussiun che dat da discussiunar

Tut ils projects per gronds implants fotovoltaics dattan da discutir el Grischun – aschia era ella vischnaunca dad Ilanz/Glion. Leu ha ina sera d'informaziun procurau avon exact in'jamna per discussiuns vehementas e tgaus cotschens. En ina sala fullanada a Glion ein ton ils purtaders dil project – l'interpresa Axpo – sco era las autoritads communalas vegnidas confruntadas cun ferma critica or dalla populaziun. Surtut il president communal, *Marcus Beer*, ha sinaquei schau siglir la chira ed ha attacau da sia vart ils critichers. – Las votantas ed ils votants dad Ilanz/Glion han da decider en diesch dis, sch'els lessan schar elavurar vinavon quels projects sin lur territori communal ni buc. E la discussiun d'avon in'jamna muossa: la debatta ei tendida. In commentari. (fmr/dat) [Pagina 5](#)

Tgei far cun seniors senza piazza?

Naven digl onn 2025 vegn ina grupp dalla populaziun el center digl interess: ils babyboomers dallas annadas 1960 tochen 1971. A Glion ha in podi discutau da quella midada demografica ch'ei dat tochen gl'onn 2050. Il podi ha tematisau la situaziun en Surselva.

AUGUSTIN BEELI/FMR

Ella vischnaunca da Tujetsch vegn ei a dar igl onn 2050 rodond 53 % persunas sur 65 onns. Igl ei la cefra pli auta dalla prognosa per la Surselva. El Grischun vegnan il medem onn rodond 31 % a s'uder tier la grupp dils pensiunai. Per Sagogn indichescha la statistica la media cantunala, a Mustér ed en Lumnezia eis ei 39 %. Igl ein cefras che rendan attent alla midada demografica che sesvilupescha ils proxims onns. Ils babyboomers dallas annadas

«Jeu giavischass ch'ei dess ina piazza per ina persuna che prepara ed organisescha occurrenz per seniors.»

Linus Maissen-Desax,
Seniora-CA, Mustér

1960 tochen 1971 vegnan ella vegliadetgna dils seniors. A quella grupp da vegliadetgna sededichescha la politica communal e regiunala aunc memia pauc. Quei cumprova il studi «Plus 65» dalla Scol'aula specialisada dil Grischun. Mesjamna han la sviluppadra regiunala *Céline Meury* e la menadra da Surselva Lab, *Livia Somerville*, envidau a Glion ad ina sera tematica. «Jeu giavischass ch'ei dess ina piazza per ina persuna che prepara ed organisescha occurrenz per seniors», ei in votum concret da quella sera. [Pagina 3](#)

«Jau na sai anc betg precis tgei emprendissadi che jau duess far.»

E precis pervia da quai ha il giuven Laurin Malgiaritta visità la «Fiutscher». – [Pagina 2](#)

Cumgià dal «bap» da la Fundaziun Nairs



FOTO BENEDICT STECHER

Cun si'ultima exposiziun e finissascha – e culla finischun da sia lavur sco curatur e directur – ha la Fundaziun Nairs preschantà las ouvas da *Christof Rösch* cun disegns, sculpturas ed architectura e tut cumgià dal directur d'art. La relaziun tanter territori ed uman han buollà sia lavur. Daspö sia prüma experienza culla natüra e culla chasa istorica in Engiadina ha *Christof Rösch* lavurà cun gronds sforzs cul contrast tanter natüra, cultura, spiert e materia sco eir cul möd d'ir intuorn cun l'istorgia. A la finissascha da sonda passada s'haja pudü atschertar da la grond'influenza artistica cha'l directur lascha inavo illa regiun. Sco artist e curatur es el il «bap» da la chasa d'artists ch'el ha miss in pè e manà durant blers ons. El ha accumulà durant ils ultims 35 ons a var 1000 artistas ed artists chi han expost a Nairs. Il Center cultural Nairs, chi's rechatta eir plü u main i'l center da l'Europa, es daspö decennis ün Mecca per l'art – uschè cha tuot las vias mainan causa la situaziun geografica a Nairs. (fmr/bcs) [Pagina 7](#)



Servetsch d'abunents e da
distribuziun: tel. 0844 226 226
mail: abo@somedia.ch

9 771424 749004



Christof Rösch ha declarà in sonda, in occasiun da la finissascha, si'exposiziun il Center cultural Nairs.

FOTOS BENEDICT STECHER

Üna finissascha cun ün cumgià

Christof Rösch, architect, artist e co-directur al Center cultural Nairs ha buollà d'ürant bundant 25 ons l'istorgia da la chasa d'artists e dal center a Scuol. Culla finissascha da si'ultima exposiziun ha el tut cumgià in sonda passada da Nairs.

BENEDICT STECHER/FMR

In ün rom festiv da l'exposiziun «Christof Rösch – architectura da sia vita» ha il Center cultural Nairs tut cumgià in sonda da seis co-directur d'art. Davo bundant 25 ons ch'el ha buollà l'istorgia da Nairs es statta sia finissascha da l'exposiziun a listess mumaint la «finissascha» da seis uffizi. Sco artist e curatur es el il bap da la chasa d'artists ch'el ha miss in pè e manà d'ürant tuot quists ons.

Il principi nun es stat uschè simpel ed infin chi's vaiva posiziunà Nairs sco cha la chasa as preschainta uossa s'haja stuvü superar divers obstaculs. I s'ha dovrà lösch fin cha la populaziun da la regiun ha badà che importanza perduraivla cha'l center a Nairs ha. Eir la politica ha al principi gnü plütost fadia da predschar la lavur da *Christof Rösch* e seis cumpogns. Cur cha la politica ha lura decis da sustgnair il center finanziamaing, ha lura eir il chantun sport man e sustgnü l'intent. Cun sponsurs ed eir cun munaida dal man public s'haja pudü realisar la visiun dals iniziants. In sia funcziun sco curatur, artist, promotur d'art contemporanea e directur ha Christof Rösch influenzà l'instituziun e pussibilità a bieras artistas ed artists da pudair lavurar e viver illa chasa d'artists a la riva da l'En.

Cun Rösch tras l'exposiziun

In sonda passada, pro la gita cun Christof Rösch tras l'exposiziun sur trais plans dal Center Cultural Nairs, ha el declarà sias visiuns, si'art e sia architectura. Las s-chars 50 visitadoras e visitaduers han survgni üna buna survista da si'ouvra. El ha lavurà a Nairs il prüm sco artist ed es stat a partir dal 1999 directur e mader artistic da Nairs. Insemel cul architect *Urs Padrun* da Guarda ha'l eir realisà la sanaziun totala dal monumaint nazional. Illa halla d'art ha el organisà e curatà d'ürant 20 ons var 100 exposiziuns ed implü organisà divers concerts, teaters, prelecziuns ed oter plü.

Il «Mister Nairs»

Christof Rösch ha declarà si'exposiziun: «La glied m'ha dat il titel 'Mister Nairs' e quai nu cumpiglia be l'ir aint ed oura dal center, ma eir d'accompagnar a var 1000 artistas ed artists d'ürant var 35 ons, ils quals han lavurà ed exposit in quist edifiz. Sco finischun da mia lavur qua a Nairs m'haja dit ch'eu less muosar üna part da mias lavurs.» Giö'l plan terrain es stat installà ün archiv cun sculpturas ed in quel local d'èiran expostas lavurs dals ultims 35 ons. Tenor Christof Rösch dess art esser alch chi va vers la glied, alch chi's dess intermetter, stess



Christof Rösch ha declarà in sonda, in occasiun da la finissascha, si'exposiziun il Center cultural Nairs.



Il Center cultural Nairs a Scuol – daspö decennis ün'instituziun culturala importanta in Engiadina Bassa.

esser dovrabel na be spiertalmaing, ma eir in möd real.

Sül plan terrain d'èiran exposts impustüt plans e models da l'architectura da Christof Rösch. «Ün gö tanter realisaziuns pussiblas cun elemaints chi fluischan ill'architectura dals ogets. Per part eir ogets ch'eu n'ha pudü realisar.» Sül plan sura s'haja vis intervenziuns chi sun neschüdas insemel cun *Ralf Hauswirth*. «No ans vain inscuntrats d'ürant decennis e vain barattà ideas chi sun per part eir expostas qua a Nairs.

No vain qua eir choshas chi han da chefar cul tema aua, cul tema chasa d'artists e tuot quai po muosar che importanza cha'l lö Nairs ha pell'art.» – E per exemplifichar quai ha Christof Rösch muosà vi d'ün exponat plü grond: «Vi da quista paraid vezzaivat üna charta geografica da l'Europa cul center Nairs, üna charta istorica cul titel: Tuot las vias mainan a Nairs.»

A la fin da la finissascha ha *Leo Bachmann*, ün cumpogn artist da Christof Rösch, sunà ün pèr tuns insolits sün sia tuba.

Cuort e bön

Christof Rösch es nat dal 1958 a Turich ed es creschü sü a Baden/AG. Davo las scoulas popularas ha el frequentà la Scoul'ota da fuormaziun a Basilea ed ha fat plü tard stüdis a Paris, Londra e Roma. Daspö l'on 1999 viva l'artist a Sent e lavura sco artist ed architect – ed ha lavurà sco directur e curatur a Nairs. (fmr/bcs)

SAMEDAN



In lündeschdi es ün schöffor crudo in ün silo termic d'ün camion a Samedan e s'ho ferieu.

FOTO MAD

Lavuraint cupicha in silo termic

In lündeschdi zievamezdi ho que do ün accidaint in ün implanta da produziun da catram a Samedan. Scu cha la Pulizia chantunela scriva in üna comunicaziun es ün schöffor crudo in ün silo termic d'ün camion e s'ho ferieu.

Cur cha'l schöffor da 43 ans vulava deliberer il silo termic vers las 14.30 da naiv e glatsch, è'l crudo in l'intern da quel. Üna squadra dal Salvamaint Engiadin'Ota ho pissero pel prüm'agüd – commembers dals pumpiers Samedan-Puntraschna haun sustgnieu l'acziun da salvamaint. L'hom ferieu ho pudieu gnir delibero our dal silo ed es in seguit gnieu mno cun l'ambulanza in l'ospidel Samedan. La Pulizia chantunela es vi dal sclerir ils motifs per l'accidaint. (cdm/fmr)

ZUOZ GLOBE



Lorenzo Polin e sia grupa d'improvisaziun Drauffischem Plus rapreschaintan in venderdi i'l Zuoz Globe.

FOTO MAD

Teater d'improvisaziun cun Drauffischem Plus

Il Zuoz Globe muossa per la prüma vouta ün teater cun l'actur indigen *Lorenzo Polin* e sia grupa d'improvisaziun Drauffischem Plus. In venderdi, ils 17 november 2023, a las 20.00, vegnan provochedas las musclas da rier dal public dal Zuoz Globe, il teater dal Lyceum Alpinum Zuoz. Suot la bachetta dal Samedrin Lorenzo Polin vegnan rapreschantos divers gös d'improvisaziun, uschenmedas disciplinas dad impro. Tar quellas ho eir il public la pussibilitad da der divers inputs e dad influenzer uschè il teater e l'istorgia activamaing. Uscheja nascha üna rapreschantaziun insolita e divertenta per giuven e vegl. Sajan eir Els da la partida cur cha que ho nom: 5-4-3-2-1-DRAUFF! L'entreda es libra e que do üna collecta. (cdm/fmr)

ZERNEZ



La Pro Senectute organisascha in sonda darcheu ün bal in l'Hotel a la Staziun a Zernez.

FOTO MARTIN CAMICHEL

Bal da la Pro Senectute

La Pro Senectute cuntinuescha ad organisar per personas attempadas inscuters per star da cumpagnia e far la trais-cha. In sonda, ils 18 da november 2023, ha lö in l'Hotel a la Staziun a Zernez darcheu ün bal. Da las 14.00 a las 17.00 suna la Chapella Val Mora. Sco cha las organisaturas ed organisatours da la Pro Senectute scrivon in üna comunicaziun, sun tuot las senioras e seniors da la regiun invidats da gnir a star da cumpagnia, tadlar la bella musica e far ün pèr trais-chas. Per dumondas as poja telefonar a *Claudio Filli* da Zuoz, tel. 079 871 77 24. (cdm/fmr)